



DEO OPTIMO MAXIMO
UNI ET TRINO,
VIRGINI DEI-PARÆ, ET S. LUCÆ,

Orthodoxorum Medicorum Patrono.

QUÆSTIO MEDICA,
QUOD LIBETARIIS DISPUTATIONIBUS
*manè discutienda, in Scholis Medicorum, die Jovis decimâ-octavâ
mensis Januarii, Anno Domini 1776.*

M. JACOBO-ALBERTO HAZON,
Doctore Medico, Præside.

An in puerperarum torminibus diversa curatio?

I.



EMINEM latet tormina, quibus post partum quandoque mulieres cruciantur, dolores esse anxios & molestissimos; hæc autem in diversis uteri regionibus sensum suum non faciunt, quin simul lymphæ sanguinea, grumique nigricantes excernantur. Quod accuratè notandum humoris profluvium indicat tormina ab ipsomet utero ducere originem. Sunt enim alia, quæ aliundè producta ab his distinguuntur, quia nullam habent uteri excretionem, ea putà, quæ intestina aut alia abdominis viscera nonnunquam experiuntur. Insuper tormina puerperarum non indefinenter, sed identidem divexantia, quodam gravitatis sensu prænunciantur. Quamvis ea ab eodem fonte ut plurimum fluant, attamen pro variis causis, pro vario recens enixarum temperamento, inter se differunt: indè in puerperarum torminibus adhibenda quandoque diversa curatio.

AD causam horum torminum explicandam multa excogitata fuerunt systemata: alii in intestinis eam sedere; alii ex lochiorum putrescentiâ; quidam ab uteri tubulorum rupturâ causam oriri volunt. Swietenius sanguinis gravorum præsentia in cavitate hujusce visceris produci autumat: nonnulli tandem sensibilitatem uteri magis auctam admittunt. Singuli autem hæc ipsam ne quidem veritatis adumbrationem nobis attigisse videntur. Humororum stagnationem in uteri parenchymate, variis adducti rationibus, censemus assignandam. Humores etenim in hujusce visceris textu stagnantes, calore loci, characterem acrimoniæ concipiunt, fibras uteri nervosas & lacertosas stimulant; inde sequitur hæc fibras contractiliores, illas sensibiliores fieri: ex hoc simultaneo effectu citò prodeunt in uteri substantiâ quædam phlogosis & erethismus; inde dolores aut tormina magis aut minus vehementia pro vehementiori stimulo, nativâque sensibilitate, diversis in mulieribus diversimodè auctâ. Hujusce stagnationis causa si quaeratur, duplex est, nempe; vel à minori elasticitate, vel à spasmodicâ tubulorum constrictione: inde torminum causæ in praxi Medicâ essentialiter distinguendæ.

I I I.

POSITO nostro systemate dilucidè potest explicari, cur in primo partu absint tormina, in sequentibus adsint, in præternaturalibus minus frequentia, post sanguinis jacturas nulla, deniquè Viragines iis non sint obnoxie?

1°. Quidem in primo partu nulla adsunt tormina, ex eo quòd uterus omni suo polleat adhuc elaterio; hinc fibrarum contractilitas major, ex quâ sequitur succorum ab uteri substantiâ prodeuntium effusio ferè subitanea; ac proinde, stimulo deficiente, nullus sequitur effectus.

2°. Adsunt in consequentibus, quia jam uteri elaterium debilitatur; unde hujusce visceris textus succis superfluis difficiliùs liberatur.

3°. In præternaturalibus minus frequentia sunt, quòd in hoc - ce casu ferè semper irritetur uterus; inde, contractiliore facto, torminum causa promptiùs expellitur.

4°. Post sanguinis jacturas nulla percipiuntur: succi enim in hujusce visceris substantiâ diffusi, ferè subito foras eliminantur.

5°. Tandem Viragines plerùmque iis non sunt obnoxie; nam in illis uterus nativâ vi semper pollens, succorum colluvie faciliùs & subito exoneratur.

Ex his patet, torminum causam esse duplicem, ac proindè diversam: illa diversitas in praxi accuratè observanda, pro deducendis indicationibus, methodoque curativâ meliùs absolvendâ.

I V.

QUOD suadet ratiocinium, ipsâ etiam multiplici celeberrimorum authorum agendi normâ confirmatur. Licet enim eorum curandi methodus sapissimè varia, imò quandoque opposita videatur, singuli tamen pro variis circumstantiis nonnunquàm prosperos habent exitus; sic methodi diluentis & temperantis fautores, quando major uteri sensibilitas spasmodicæque vasorum constrictio phlogosim & erethismum constituunt; Calidi verò regiminis affectu, cùm uterus laxior minori gaudet, elaterio, ad causam torminum expellendam diversimodè perveniunt. Verùm æquali sorte deficit utraque methodus, siquidem in priori casu fibrarum debilitas; in posteriori verò tensio nimia locum obtineant. Nil mirum etiam, quod Empirici, Circulatores, ipsæque Aniculæ inconsultò semper agentes, eadem adhibendo remedia in omnibus singulisque circumstantiis, casu fortuito, quandoque feliciter morbum expugnent; verùm sapissimè symptomatibus maximè periculosis, etiam lethiferis originem procreant.

His expositis, varias ad curanda puerperarum tormina indicationes esse adimplendas abundè demonstratur.

V.

IN torminum curatione minuenda ut plurimum uteri sensibilitas, moderandaque hujusce visceris spasmodica constrictio, ex quâ, ut ita dicam, procedunt phlogosis & erethismus; indè generatim lenientium, temperantium usus, ut aquæ pullinacæ, aut vitulinæ, serum lactis, omnes plantarum nitrosarum infusiones, clismata emollientia & blandissima; balneationes, cataplasmata anodina in uteri regione, anti-histerica, quandoquè moderata, cum felicissimo successu narcotica persæpè usurpantur. Si autem pro tantâ constrictione timenda sit inflammatio, tunc non rejiciendæ applicationes hirudinum, injectiones diluentes, saphenæ sectio, &c.

Viâ autem omninò contrariâ procedendum, si tormina ex fibrarum debilitate pendeant, tunc levibus tonicis, stimulantibusque, alexipharmacis variis, pro majori vel minori relaxationis gradu recurrendum; ut juscula vervicina, aut alia hujusce generis exquisita: Croci, Santali

Citrini, Arthemisiæ, Melissæ, Roris-marini, aut Salviæ & Menthæ infusiones &c. Celebranda sunt etiam linimenta aromatica, frictiones nervinæ, &c.

Cæcâ ab Empirice innumera proposita fuerunt remedia, quorum alia rejicienda sunt, ut periculosa: quales sunt spiritûs vini mixtiones cum ovorum vitellis, nuces trituratæ, jusculeque mixtæ, omniaque generatim spirituosâ & olea. Alia quandoque, sed prudenti manu & cautè adhibenda; ut v. g. exquisita perdicum juscule, vina generosa cochleatim sumpta, &c.

At, iniquient nonnulli, tormina puerperarum una & eadem sunt, cum unam & eandem causam agnoscant primariam, partum scilicet; indè unica adhibenda curatio. Sic objicientibus respondendum: tormina generatim una & eadem sunt, esto. Sed tamen pro peculiaribus causis inter se differunt; id est, temperamentis, ætate, partium numero, anni tempestatibus, locis, pro variâ tandem diætâ, indè concludere fas est:

Ergo in puerperarum torminibus curatio diversa?

DOMINI DOCTORES DISPUTATURI.

M. Felix VICQ D'AZYR, Regiæ Scientiarum Academia Socius,
S. Comitûs Atrebatum Medicus.

M. Franciscus THIERY, Eques;
Regis è salubri Consilio, Regis Medicorum Collegii Nancæii Socius honorarius, Regique ejusdem civitatis Scientiarum & humanorum Litterarum Academia, necnon Bituricensis.

M. Antonius Chaumont SABA- M. Henricus - Joannes BAGET. M. Anna-Claudius DORIGNY.
TIER.

M. Joannes-Franciscus-Achilles M. Carolus Jacobus SAILLANT. M. Ludovicus-Joannes-Baptista
LALOUETTE, Eques. COSNIER.

Proponebat Parisiis JOANNES-RENATUS SIGAULT, Divionæus, Doctor Medicus Andegavenfis, necnon Facultatis Medicinæ Parisiensis Baccalaureus. Thæseos Author. A. R. S. H. 1776, à sextâ ad Meridiem.